

王屋山記

李濂

王屋山在濟源縣西百里禹貢曰底柱析城至於王屋是也以其山形如王者車蓋故名或曰山伏如屋也又曰山空其中列仙宅之其內廣濶如王者之宮也按龜山白玉上經暨茅君內傳皆云大天之內有玄中洞三十六第一曰王屋之洞周圍萬里名清虛小有之天杜甫詩憶昔北尋小有洞卽此山也其絕頂曰天壇常有雲氣覆之輪菌紛郁雷雨在下飛鳥視其背相傳自古仙靈朝會之所世人謂之西頂蓋以武當爲南頂泰山爲東頂而並稱三頂云余夙慕天壇王屋之勝顧塵事羈縛恒以未獲一遊爲憾歲乙巳三月十三日乙亥早起渡河往遊是

道藏輯要

天下名山記
河南王屋李

李

軫集四
卷之三

夕宿原武翌日丙子宿武陟丁丑宿覃懷戊寅宿濟源己卯晨出縣城西走溝中四十里飯胡嶺又折西南行十五里度秦嶺皆行山上逾五里至劍河堡南行又折西北行十五里至陽臺宮在王屋山之麓唐司馬承禎修真之所也明皇御書寥陽殿三巨字殿中塑昊天上帝像旁侍十二宮辰皆偉麗而白雲道院乃在寥陽殿之東曰白雲者承禎別號也入道院見大鑊一徑丈深數尺勝國時物也宮之南有八仙嶺其勢如八仙飾冠佩下天拱揖而嚮陽臺又有仙猫洞不老泉皆去宮不遠出陽臺宮東北行下山百餘武謁煙蘿子祠祠前有洗參井祠卽煙蘿子宅址也煙蘿子者晉天福間人世傳煙蘿子佃陽臺宮田

苦積功行忽一日於山中得異參闔家食之拔宅上昇云過祠
北行澗道中蹇亂藤履危石東西兩山壁立千仞風颼颼起巖
谷林木間令人震恐礪道中行八里復上山坡壘巖盤曲莫記
層數乃循石磴道士導引入紫微宮仰視臺殿如在天上至門
金書榜曰王屋山朝真門門內爲天王殿榜曰天下第一洞天
又上一層曰三清殿而對華蓋山如几案然又上一層曰通明
殿設昊天上帝像殿中環列朱龕貯國朝御賜道藏經若干函
有碑數十通皆宋金元時物薄暮酌方丈之松菊堂翌日庚辰
夙興爲天壇絕頂之遊乃乘小山轎僕夫持縵牽輿以上出紫
微宮西上二里至望仙坡閱披雲子修煉之跡又上四里至憩
息亭凡登絕頂者至此必茗飲少憩故名其地有仰天池四面
高而中凹舊有泉今涸至此則山徑愈峻險轎不可行乃步以
上過此則躡瘦龍嶺登一天門曰瘦龍者以山脊之癭如瘦龍
露骨也過一天門登十八盤山石壁陡絕旋繞而上至躡雲嶠
觀煙蘿子登仙石石上有足跡下有澗曰避秦溝又稍上則紫
金巖巖之右有三官洞洞前有仙人橋少頃至南天門則愈陡
絕手攀鐵索以上觀軒轅黃帝御愛松小憩換衣亭謁玉皇殿
殿之東曰清風臺西曰明月臺皆巨石也又行數十步至絕頂
入虛皇觀謁軒轅廟真君祠乃涉三級瑤臺極其遐覽東曰日
精峰日始出時精彩爛然西曰月華峰月上時光華先見也於

道藏輯要

天下名山記
河南王屋李

卷

軫集四
80

是東望海岱西眺崑邱北顧析城南俯黃河如線如嵩山少室
隔河對峙咸聚目前下視華蓋諸山卑如培塿竊意天下奇觀
無踰此者余徘徊久之乃下三級瑤臺徧觀今古諸石刻而日
已曛矣是日宿上方院偶思李白詩願隨夫子天壇上閑與仙
人掃落花之句超然有遺世獨立之心焉余入寢室將就枕道
士走報請觀天燈亟出視之則見遠火如流星下上明滅杳無
定跡時從行者咸相顧駭異辛巳昧爽起觀日始出之景甚奇
天旣明陰雲蔽翳移時頃之開霽步至北天門見古松十數株
天矯如虬龍環列成行儼如侍衛皆千百年物也遂觀捨身崖
志心石在東北虛巖之上突出一石闊尺許長丈餘勢欲飛墜

道藏輯要

天下名山記
河南王屋李

壘

軫集四

下瞰峭壑神悸股栗又觀老子煉丹池池上有老子祠古碑存
焉聞東北有王母洞奧邃莫測人跡罕至元歲時投金龍玉簡
於此余欲往遊之道士曰徑險不可行且有蛇虎潛其中乃下
南天門一里許遊黑龍洞洞前有太乙泉一曰太乙池蓋濟水
發源處也世傳析城之山升白氣於天落五斗峰化爲濕雲白
竇中滴水降太乙池云道士曰每歲諸元會日五更之初輒聞
仙鐘自遠洞中發聲悠揚清婉可聽又曰日出沒時間有倒景
之異余暫遊速返悉未之逢也是日由舊途下山仍宿紫微宮
曩余嘗夢遊一山極奇絕嗣後遊四方名山無似者乃今登覽
王屋種種與夢中所見合夫豈偶然者哉